

LA QUOTIDIANA

FMR Fundaziun Medias Rumantschas, Via da Masans 2, 7000 Cuirra, 081 544 89 11, redacziun@fmr.ch



350 personas en las chaglias a Trin

Mintga dus onns è a Trin il di da chaglias. Igl è in'acziun da lavur cumina per cuntrada e natira. [Pagina 4](#)



Regula Bochsler e la Fabrica da Domat

L'autura dal cudesch «Nylon und Napalm» è stada a Glion. Là ha ella discurre da l'Ovra da Domat. [Pagina 6](#)

FMR FUNDAZIUN
MEDIAS
RUMANTSCHAS

südostschweiz

ENGIADINA

Üna val as metta sün «Nossa via»

Il Parc da natüra Biosfera Val Müstair ha invidà in sonda passada a personas interessadas da gnir illa sala da gimnastica da la scoula da Müstair per s'infuormar davart ils prossems pass strategics e progets concrets pels ons 2025–2028. L'instituziun chi'd exista daspö il 2011 ha dat a quel palperi strategic il titel «Nossa via». Ils progets preschantats a Müstair sun gnüts elavurats in ün process participativ insembel culla populaziun e cun gruppas d'interess. Il mainagestiu da la Biosfera Val Müstair, *David Spinnler*, ha orientà in sonda in detagl davart ils progets. Cun quellas ideas as lessa uossa persvader la Confederaziun ed il chantun da sustgnair inavant il parc e da metter a disposiziun la munaida bsögnavla per realisar ils giavüschs elavurats. (fmr/bcs) [Pagina 7](#)

SURSELVA

Inaugurau il tetg solar



Mario Blumenthal, Marianne Bill, Maurus Caffisch, Jürg Huder, e Barbara Hirsbrunner (da san.) han inaugurau la baselgia. FOTO MAD

Il project da 320'000 francs ei buca staus voluminus. La discussiun surlunder denton bein. La pleiv da Trin ha renovau sia baselgia, e quei cun in implont solar sil tetg dalla nav. La baselgia historica baghegiada da niev gl'onn 1491, sils mirs d'in baghetg pli vegl, ei l'emprema che installescha in implont per fotovoltai-ca. Cun in survetsch divin festiv ha la pleiv inaugurau ier dumengia il project finiu. La Tgira da monuments dil Grischun haveva deponiu sias resalvas ed era la Protecziun dalla patria era s'exprimida en caussa. Malgrad tut ha la vischnaunca dau alla pleiv la lubientscha da baghegiar. Grazia alla discussiun en caussa da fotovoltai-ca sin monuments historics han ils da Trin optimau lur project. Cun moduls specials han ins curclau gl'entir tetg semegliont sco quei ch'ins havess curclau cun tievlas, slondas ni sturos. La baselgia da Trin vegn d'ussa naven ad esser prototip ed exempel per auters pleivs. (fmr/abc) [Pagina 5](#)

GRISCHUN CENTRAL

Prest vegni puspè tratg crappa

Il sport da curling è en il Grischun Central dapli che be in sport da nisch. Gist tschintg clubs datti en Surmeir: Alvagni Bogn, Bravuogn, Filisur, Lai/Valbella e Savognin. E quai gia dapi blers onns. Il club da curling Savognin datti gia dapi l'onn 1965, pia varga 50 onns. Dapi in onn president dal club da curling Savognin è *Damian Dosch*. El ha surpiglià l'uffizi da *Conrad Plaz* che è stà al timun dal 2014-2022. Actualmain è il club anc a la tschertga da sponsurs e commembers. (fmr/gns/sb) [Pagina 8](#)

Al puls dal corp litterar

Durant trais dis è la Sala Tircal a Domat stada il palc per il «corpus» litterar rumantsch. Ils 32 avels Dis da litteratura han procurà puspè per inspiraziun e buna atmosfera – questa giada cun in program varià sut il motto «corps».

SANDRO BUCHLI/FMR

Var 50 auturas e musicists, edituras ed auturs èn stads da venderdi fin dumengia sin il palc tar ils 32 avels Dis da litteratura (DDL) a Domat. Igl èn stads trais dis chargiads cun prelecziuns, raquints, shows, texts curts, discurs, musica, teater ed anc bain inqual altra buccada per egl, ureglias, chaus e cors rumantschs. Il motto dals DDL è numnadain stà il «corp» – ed ils «corps» èn vegnids en rotschas en Sala Tircal, sco ch'il comitè d'organisaziun ha pu-

di communitgar dumengia sco bilantscha dal festival.

Fimar e gendrar

En in dals puncts culminants – la sonda saira – ha il rockadur rumantsch *Benedetto Vigne* preschentà las chanzuns ed ils texts da ses nov disc e cudeschet. El ha fatg quai ensem cun numerus collegas musicists e musicistas. Als DDL èn però era quest onn vegnids preschentads novs cudeschs, sco per exempel «Cunterfem», frestg or da stampa cun istorgias curtas da

Jürg Gautschi. En il punct da program «sfegliar e discutir» han *Viola Cadruvi*, *Nadina Derungs* e *Michele Badilatti* analisà il nov roman da *Gianna Olinda Cado-nau* sco er il comic «Il Crestomat» da *Sabrina Bundi* e *Michel Decurtins* (guarda pagina 3).

Ed ina discussiun al podium ha – suandond la tematica «corp» – prendi per las cornas il «gendrar» en la lingua e litteratura rumantscha (guarda pagina 2), ina tematica spinusa ed actuala en bleras linguas.

[Paginas 2 e 3](#)



FOTOS DALS DDL DA DOMINIK HARDEGGER E DOMINIC POHLE/RTR

«Las cellas solaras ein era portasperanza.»

E quai betg mo per dar dumogn al fraid en la baselgia da Trin. – Pagina 5



Servetsch d'abunents e da distribuziun: tel. 0844 226 226
mail: abo@somedia.ch